

ADASA NDZINOA HO DAWURBO

NYIENYIM

Onam de adasa hon enyimnyam ye per na ndzinoa a obi nngye mmfi hon nsamu a wowo no ngyetomu nye wiadze yi mu fahodzi, perperdzi, ntsentsenenee na asomdwee ne fapem;

Onam de tsia a yetsiatsia nyimpa ne ndzinoa do no dze ewurkadze nwenwen a obiara tsia aba, na afei so wobao wiadze a oreba a no mu nyimpa benya fahodzi wo kasa, gyedzi, suro na ohia ho dawur de nyimpapem nyina hon ahwehwedze tsitsir,

Onam de ohia pepepe de yemme de yeye adasa ndzinoa ho mbra,

Onam de ohia de wotu aman na aman ntamu anyenkoye nkitahodzi mpon,

Onam de Amanaman Nkabomu Kuw mu nyimpa nyina edua Farbaa Nwoma no do agye hon gyedzi aowo adasa awose ndzinoa, nyimpa n'enyimnyam na nyimpa no bo a osom, na mbanyin na mbaa hon ndzinoa a oye per ato mu na wobao hon enyim biriw de wobotu asetsena mu kanko na atseyie mpon,

Onam de aman a wodom Amanaman Nkabomu Kuw no abo odabaa de wonye Kuw no beye ahwehwe amansuon nyina enyiedzi ama adasa ndzinoa na awose fahodzi ntsi.

KUW NO BAGUA KESE NO

Paa mu ka de:

Afei,

NHYIAMU KESE NO YI ADASA NDZINOA HO DAWURBO no kyere de: ono nye nhwɛdodze tsitsir aowo ho ma nyimpa na aman nyina, ama ankorankor biara na nyimpa kuw biara, se wodze dem dawurbo yi si hon enyim a, woaabo mbɔdzen edua nkyere na adzesua do ama nkorɔfo eedzi ndzinoa na fahoazi ahorow no nyi; na woaatoa do afa honara hon man na amanaman nhyehye de wooma woaagye dawurbo yi ato mu na woedzi do wo Aman a wodom Nkabomu Kuw no mu biara mu nye asaase biara a wohye hon ase no so do.

Asempow 1

Wowo adasa nyina to fahodzi mu, na hon nyina ye per wo enyimnyam na ndzinoa mu. Womaa hon nyina adwen na tsibowa, naowo de hon nkitahodzi mu ndzeyee da no edzi de woye enuanom.

Asempow 2

Obiara wo ndizona na fahodzi a woado no edzi wo Dawurbo yi mu no ho kwan a nyiyimu biara nnyi mu a ofa no obi n'awosu anaa no honamenyi ngyegyee mbre otse, de oye banyin anaa oye basia, ne kasaa a okaa, ne nyamesom mbre otse, amanye ho adwen aowo, ne man anaa asetsena mu gyinabew a ofi mu, egyapadze aowo, n'awofo hon gyinabew anaa gyinabew fofor biara so aowo ho.

Bio, onnyi de wogyina oman a obi fi mu no n'amanye kwan, ne mbra anaa n'amanandze gyinabew do-de oman no dzi ne mansin, de ohye oman bi no nhwedo ase, anaade onnyi fahodzi, ye nyiyimu tsia nyimpa no.

Asempow 3

Nyimpadua no nkwa, ne fahodzi, na no tototo ye obiara ne ndzinoa.

Asempow 4

Onnyi de wodze obiara to nkowaasom mu anaade woma osom osomhun; owo de wogu nkowaasom na ndonkogua korakora.

Asempow 5

Onnyi de woye obiara ayakayakadze, etsidzendze anaa enyinyandze anaa wotsea no anaa woma no asotwe biara a ose dasanyi n'enyimnyam.

Asempow 6

Oye obiara ne ndzinoa de, mbra mu, wobu no de nyimpa wo beebiara.

Asempow 7

Nyimpa nyina ye per wo mbra no enyim, na hon nyina fata mbra no ne ntwitwagye a nyiyimu nnyi mu. Obiara wo ho kwan de mbra no bo no ho ban tsia nyiyimu a obu Dawurbo yi mu nsempow no mu biara do no, nye nunu biara a wonunu nyimpa ma oye ma oye nyiyimu no.

Asempow 8

Obiara a woye bon etsia ne ndzinoa a mbra na amambu ho mbra ma no ho kwan no, wo ho kwan de odua asendi baguafo do gye nsiesie anaa mpata a ofata.

Asempow 9

Onnyi de abotsirmu ara woker obi, wodze no sie, anaa wotwa no esu.

Asempow 10

Obiara wo ho kwan de bagua asendzifo a wonnton hon asowa nndzi tsena hwehwe n'asem mu pefee wo ne ndzinoa, n'asadze anaa ewudzisem ho sombo bi a wodze abo no ho.

Asempow 11

Obiara a wobao no sombo bi a odze ntsea nam no wo ndzinoa de wobu no de odzi bem kesi de, woedzi n'asem ama no kwan biara a ohia de odze tstsew no ho, na woebu no fo de mbre mbra kyere.

Onnyi de wobu obiara fo na wotsea no wo ndzeyee bi a onnye ntsea nam ase. Na eso onnyi de woma obi ntsea a obor no mfomdo a oye no ho ntsea do.

Asempow 12

Onnyi de abotsirmu ara wodze oho hyehye obi no kokoamunsem, n'ebusuasem anaa n'efisem mu; anaade wogu n'enyimnyam na ne dzin ho fi. Oye obiara ne ndzinoa de mbra bo no ho ban tsia ndzeyee a otsetse dem yi.

Asempow 13

Oye obiara ne ndzinoa de okyinkyin na otsena oman bi n'asaase do bea biara a ope.

Oye obiara ne ndzinoa de ofi oman biara mu (noara ne man ka ho) na osan ba ne man mu bio.

Asempow 14

Obiara wo ndzinoa de ohwehwe na onya guansuma wo oman bi do fi atsetsee ho.

Onnyi de dem ndzinoa yi wobisa wo bon bi a ommfa manye ho anaa otsia Amanaman Nkabomu Kuw no ne nhyehye a onyia no aye ma woridzi n'asem wo ho biara ho.

Asempow 15

Obiara wo ndzinoa de oye oman bi ba.

Onnyi de abotsirmu ara woma obi hwer n'amambaye, anaade womma no kwan mma onnsesa n'amambaye.

Asempow 16

Oye mbanyin na mbaa a hon enyi efirir hon ndzinoa de wwar na wowo mba, na awosu, amambaye anaa nyamesom nnsiw iyi ho kwan. Mbanyin na mbaa nyina hon ndzinoa a wowo no awar ho no ye per wo awar ber no mu nye awar no ngui no mu so.

Adze ara aowo de awar no gyina do nye asakuw ebien a worowar no hon pe a nhye nnyi mu.

Okun, oyer na mba bo mu kor de aboasee kuw a nyimpa kuw biara ne farbaa fi mu wo adasa mu, na oye hon ndzinoa de nyimpakuw no na oman no bo hon ho ban.

Asempow 17

Obiara wo ndzinoa de onya egyapadze a oye no nko nedze, anaade onye nkorofa bi bo mu nya dem egyapadze no.

Onnyi de abotsirmu ara wogye obi n'egyapadze fi ne nsamu.

Asempow 18

Obiara wo ndzinoa de oye n'adwen, osoa noara ne tsibowa, ofa nyamesom biara a ope. Dem ndzinoa yi ne fa bi nye kwan a obiara wo de osesa ne nyamesom anaa ne gyedzi na kwan so a ofa do dze ma ne gyedzi no da edzi wo bagua mu anaa nsumaa mu, de ono nko anaade nyimpa binom ka ho wo iyi mu.

Asempow 19

Obiara wo ho kwan de okyere n'adwen wo biribi ho. Dza oka dem ndzinoa yi ho nye de obiara botum aye n'adwen wo biribi ho a ntotoananmu biara nnyi mu. Dza oka ho bio so nye de otum anaa otsie asem nye nsusui biara a onam kwan biara do na efi mbea nyina, na oma nyimpa binom so tse.

Asempow 20

Obiara wo kwan de oko nhyiamu a oye asomdwee ase, na odom fekuw biara.

Onnyi de wohye obiara ma odom fekuw bi.

Asempow 21

Oye obiara ne ndzinoa de osuo mu ma wobu ne man de onoara dzi bano wo mu, anaade obosuo mu ma woeyi ananmusifo.

Oye obiara ne ndzinoa de onya kyefa wo oman adododze biara aowo ne man mu no mu.

Owo de aban no tum gyina omamfo hon pe do. Dem pe yi wonam ambatow a no mu da ho a wotow no ne ber ano do da no edzi, akorofa a waso ambatow no wo de woma wotow amba wo nsumaa mu a nhye biara nnyi mu.

Asempow 22

Ankorankor biara, de oye omamba bo, wo ndzinoa de oman no bo n'eyiedzi ho ban. Owo de wofa oman no no mbodzen do, anaa bataboa bi a dem oman no nye oman fofor bi ye do ma omamba biara n'eyiedzi ba mu de mbre oman kor no ne sikasem, n'asetsena na n'amambra no tum a oma n'enyimnyam dzi mu no tse.

Asempow 23

Obiara wo ndzinoa de oye edwuma. oye ne ndzinoa de ofa edwuma a ope de oye, na oye ne ndzinoa de woma no edwumaye mu nhyehyee pa, na wobo noho ban fi fietsena ho.

Oye obiara ne ndzinoa de woma no akatua a ofata n'edwuma a oye a, nyimpa nyiyimu biarannyi mu.

Obiara a oye edwuma no wo ndzinoa de onya akatua a ose na otsen a obema onye n'ebusuafo enya asetsena a ofata nyimpa n'enyimnyam, na se ohia mpo a, owo de wodze asetsena mu nhyehyee ho ekyigyina bi foa akatua no do.

Oye obiara ne ndzinoa de otsew anaa odom edwumayefo kuw bi dua do dze bo n'eyiedzi ho ban.

Asempow 24

Obiara wo ahomgye na bondodziber ho kyefa; mber a wahyehye a omma edwumaye mmbor do, na akwanma ber a wotua odwumayenyi no kaw so ka iyi ho.

Asempow 25

Obiara wo ndzinoa de onye n'ebusuafo nya asetsena yi mu eyiedzi a obema woee nya ahoodzen nye asetsena pa, edziban, akataho, tsenabew, eduye na asetsena mu nhyehyee pa.

Oye obiara ne ndzinoa so de, ze ohwer n'edwuma, oyar, onya dzemdzi bi, no hokafo wu, mpanyinye ma oye mberew, anaade biribi ama ma onntum nnhwe noho a, onya asetsena mu ekyigyina. Owo de mbasiafo a wotur mba na mbofra nyina woma hon mboa soronko. Mbofra nyina, de wowoo hon wo awar ase, anaade wowoo hon wo sonmu, wo de woma hon asetsena mu bambo per.

Asempow 26

Oye obiara ne ndzinoa de ohu nwoma. Mbofraber mu nwomasua na ahyese nwomasua a otse dem no nnyi de wogye ho sika. Oye nhye de abofra biara nya mbofraber mu nwomasua. Owo de woma mfidwuma, na nsaanodwuma ho adzesua nye dwumadzi horow ho nwomasua ye beberee. Suapon mu nwomasua so wo de oye beberee na obiara a no mbodzembo fata no woma no ho kwan.

Owo de nwomasua nyina no botae ye de ohwehwe nyimpa dasanyi no mu nyina no mpontu nye enyidzi kese a obeba nyimpa mu wo adasa hon ndzinoa ahorow a wowo no ho. Owo de otu ntsease, gyaamu-ma-onka na anyenkoye mpon wo aman, nyimpakuw na nyamesom ho ekuw nyina mu; na oboboa atow Amanaman Nkabomu Kuw no dwumadzi ako kan dze ama asomdwee eetsim.

Awofo wo ndzinoa de wobekyere nwomasua kor aowo de hon mba nya.

Asempow 27

Obiara wo ndzinoa de odze noho fora ne man m'amambra mu na onya enyigye fi oman no n'amandze nsaanodwuma mu na onya kyefa wo abodze nyansape na mfaso a odze ba no mu so.

Obiara wo ndzinoa a ofi abodzenyansape, nwomasua anaa amandze, nsaanodwuma adzeye bi a noara dze bobo adze no mu ba no ne bambo no mu.

Asempow 28

Obiara wo ho kwan de onya kyefa wo asetsena anaa amanaman nhyehyee a okitsa ndzinoa na fahodzi horow a woada no edzi wo dem Dawurbo wo Mpaamuka yi mu no mu.

Asempow 29

Obiara wo asodzi wo nyimpa kuw a otse hon mu no mu; ho nko ara nye bea a no mpontu a odzi mu botum aba a akwansiwdze bi nnyi ho.

Ber a obi dze ne ndzinoa na ne fahodzi ridzi dwuma no, owo de oye dza mbra hwehwe wo no ho ama binom so eenya hon kyefa nye hon fahodzi. Owo de onya no bo bra tsenenee na oye guadoadzeye de mbre ododow amambu mu eyiedzi adzeye ho ntsetsee tse.

Onnyi de wofa kwan biara a otsia Amanaman Nkabomu Kuw no ne nhyehyee do dze hwehwe ndzinoa na fahodzi ahorow yi.

Asempow 30

Onnyi de nyimpa biara ma nkyerease wo Dawurbo yi mu nsem yi ho a obema oman, nyimpakuw anaa ankorankor bi tum ma oaye biribi a obese ndzinoa na fahodzi

ahorow a woada no edzi wo nwoma yi mu no.